

Govor prvog zamjenika visokog predstavnika i supervizora Scanlana na svečanoj akademiji povodom obilježavanja 19. godišnjice Policije Brčko Distrikta

Poštovani šefe Policije, gospodine Pisiću,

Poštovani gradonačelnice Miliću,

Poštovani predsjedavajući Skupštine Kadriću,

Uvaženi gosti i prijatelji Brčko Distrikta,

Dame i gospodo,

Čast mi je biti danas s vama na proslavi Dana policije Distrikta Brčko.

Na početku bih želio javno čestitati šefu policije Pisiću na tome što je u februaru imenovan na još jedan četvorogodišnji mandat.

Još četiri godine na čelu hrabrih muškaraca i žena u Policiji Distrikta Brčko koji služe zajednici, u jačanju profesionalnosti ove izuzetne policijske strukture.

Šef Pisić i policija Distrikta Brčko mogu računati na moju stalnu podršku.

Policija Distrikta Brčko je pokretačka snaga u jačanju koordinacije i saradnje sa policijom u cijeloj zemlji. Također

su aktivno uključeni u regionalnu saradnju učestvujući u operacijama provođenja zakona. Kriminalci ne poznaju granice i zato je koordinacija koja prelazi unutrašnje administrativne granice, kao i međunarodne granice, od suštinske važnosti.

U tijesnoj saradnji sa mojim uredom, Policija Distrikta Brčko izradila je nacrt zakona kako bi se ojačalo efikasno finansijsko i kadrovsko rukovođenje policijom i dodatna transparentnost u procedurama odabira vodećih policijskih zvaničnika. Uz hvale vrijednu efikasnost, Vlada i Skupština ovaj nacrt su pretočile u zakon. Posebno želim pohvaliti jednake i pravične odredbe vezane za penzionisanje za sve zaposlene u policiji Distrikta.

Radujemo se prelasku policije u nove, moderne prostorije – što je planirano za januar – a želim pohvaliti i napore šefa Pisića da se okrene mladima, kroz ljetnu policijsku školu. Vjerujte mi da nijedan napor nije nebitan kada je cilj to da se vaš najveći resurs – vaša djeca – uvjere da svoju budućnost vežu za ovu divnu zajednicu, između ostalog i kao dio ovih izuzetnih policijskih snaga, jer bez njih nema budućnosti.

Na svim svojim ovdašnjim sastancima, podsjećam političare na to da je napredak moguć samo kada javni interes stave na vrh prioriteta.

U tom smislu, jedan od osnovnih prioriteta treba biti poduzimanje hitnih aktivnosti da se zaustavi odlazak mladih, u čemu je Brčko, nažalost, vodeće u poređenju sa ostalim sredinama u Bosni i Hercegovini.

Ovaj trend bi trebao biti zvono za uzbunu za sve u Brčkom. Kako se to može dešavati u zajednici koja ima najveći budžet po glavi stanovnika u BiH?

U tom smislu, pozdravljam opredjeljenje koje su mi potvrdili vodeći ljudi Distrikta, pa i svaka politička stranka u Brčkom, da su odlučni u namjeri da odmah rješavaju ovaj problem. Tokom ove jeseni dobićemo novi način dodjele sredstava iz budžeta i

novi zakon, čime će se poboljšati pružanje usluga građanima, sa ciljem privlačenja domaćih i stranih investitora koji otvaraju dobro plaćena radna mjesta i koji unapređuju razvoj infrastrukture u Distriktu, uključujući i završetak modernizacije Luke i rekonstrukciju mosta.

Svaki segment društva ima ulogu u kreiranju Distrikta kao dinamične zajednice u kojoj mladi ljudi žele ostati, raditi i podizati svoju porodicu. To je osnovni zadatak izabranih zvaničnika u Brčkom, ali je isto tako i kriterij po kojem bi birači trebali procjenjivati rad svojih zvaničnika, uključujući i za koga će glasati na sljedećim izborima.

Danas pozivam lidere ove istinski izuzetne zajednice da udvostruče svoje napore na jačanju vladavine prava i kreiranju svijetle budućnosti koju Distrikt i njegovi građani zaslužuju. Znam da je odlična policija Distrikta Brčko spremna da uradi svoj dio posla.

Gospodine Pisiću, hvala Vam još jednom na odličnoj saradnji. Posebno sam zahvalan na naporima koje Vi i vaš tim poduzimate kako bi pomogli u organiziranju mojih posjeta Distriktu i koristim ovu priliku da Vama osobno i svakom pripadniku Policije Brčko Distrikta iskreno čestitam vaš dan.

Hvala vam.

Živjeli.